



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



**North Korea lenir Kim-i
missile tendangba asadang**



**Everton-i George atema £24m
agütsütsü mulunga agizükogo**

VOL. XXIII ISSUE NO. 263 (ADOK 263) DIMAPUR TENTONÜ (MONDAY) CHITENI (JULY) 06, 2026

₹ 5.00

Jantar Mantar nung E20 anema lungkak aitogo; Ethanol ajanga gari raksatsür

New Delhi, July 5, 2026

(Agencies): India nung national Ethanol Blending Programme kanga dang aritepa mapa kuma inyakba atema social media nung sorkar aija arur Deobarnü gari kiburtem New Delhi kübok Jantar Mantar nung adenshir lungkak aitogo.

India nung E20 mandate anema on-ground protest mezüngbubaji iba ya lir. Tanü gari kibur aikati osangbener den parnok gari nung timtem balala adokba atema lungkak aitba nung shilem agiba lemsatapa liasü.

Iba sentong ya "Hamaari Gaadi, Hamaara Adhikaar" omen nung ajemdaker entrepreneur & TV personality Tehseen Poonawala-i anir par advocacy initiative Team Bharat ajanga ayongzüka agi.

Centre sorkari tashiyim agi E20 petrol (20% ethanol blended with 80% petrol) merangba anema Jantar Mantar nung lungkak aitba sentong ayongzü.

E20 petrol ajanga gari indang mileage ajemer aser gari engine raksar ta asüba ya Centre sorkari

magizüker.

Tanü lungkak aittsü ayongzüka jakdang automobile aser energy sectors nungi experts telok kati Centre sorkar ethanol-blending programme pusema nungitogo. E20 ajanga garitem nem timtem agütsüba kuli kecha mangu ta parnok extensive testing nung bushitetba osang lemsatap.

E20 petrol ajanga garitem nung timtem adoker ta tanü lungkak aiter aikati shiogo. Iba policy ya Union Minister Nitin Gadkari ajanga benoka inyaker saka tanü lungkak aitertemi political party telemsa kecha meli shilem agiogo. Lungkak aiter aikati parnok BJP pusemertem saka ethanol-blending policy anema noktaker ta shia liasü.

Ita aika social media nung garitem raksaba, ajungbena mileage ajema akümba, fuel filter tangbangba aser repairs tulu asüba indang video tem prokshia aruogo.

Centre sorkari kanga dang aritepa linük ajungalen Ethanol Blended Petrol (EBP) programme tenzüka liasü aser iba ya küm pungu jelia tenzüka

sentong ka lir. Iba ya gari kiburtem madak experiment agiba lir ta iba policy anema noktakerteri ashir.

Tesüiba küm 15 tsünga India nung gari yokdokba 80% tashi E20 den meputep (compatible) masü kechiyong gari teimbaka E10 mesüra lower blends atema yanglua lir ta parnokisa ashi.

Gurgaon nungi Sarthak ta ser software engineer kati ashiba agi pai 2018 Baleno (E10 compliant) ka anishir aser mileage kanga ajema kümogo.

"Tesüiba ita ana nung kü gari mileage 18 km a litre aliba nungi 14 km teküpok aluogo. Iba ya mileage nung 22% ajemba lir" ta pai ashi.

"Ni tesüiba ita tenet tashi sen kümzüksü ta bilema E20 enoka arur saka taoba ita kü gari nung timtem adok aser engine warning light adok. Kü gari nung fuel system ajunga merüktet aser parts kar melentsüsa aküm. Iba nung ni Rs 35,000 tema endok" ta Raj Singh ta ser Delhi nung alir katia ashi.

"Kü gari ajungbena anen aser authorised service centre-i atsür aotsüsa aküm. Idakji inyakertemi ethanol ajanga gari raksa ta ashi. Anogoshia gari tenet-ti shi kasa khuret adoker bener arur ta staff-i kü dang ashi" ta Skoda Slavia gari anir Mudit Agarwal-i ashi.

"Ethanol ajanga wear & tear adokdaksür, onoki ibaji okadak kuli agütsütsü. Ethanol ajanga fuel filter aser pipeline ajunga tangbanger" ta Team Bharat nungi auto enthusiast aser rally driver Ratan Dhillon-ia metetdaksü.

"Nitin Gadkari indang experiment ajanga asenok garitem raksatsür aser külen sugar mills nung par medemertem pelatapa bank-i aoer" ta New Delhi nung alir Shiv Bhatt-ia ashi.

Ethanol ajanga sugar industry ajangzüker kechiyong ethanol ya moji (sugarcane) nungi agiteter.

Uttar Pradesh nung registered sugar mills (over 155) teimtiba lir aser Maharashtra nung operational crushing mills (over 195) teimtiba lir.

Maharashtra nung sugar

industry ya political party balala nung tanishirtem den sendaktepa lir. Politician temi cooperative aser private mills den sendaktepa lir aser parnok karbo mill kiburtem lir aser iba ajanga rural vote banks ama amshir aser sorkar nungi senotsü teyari angur.

Iba jagi lungkak aitertemi iba policy atema politicians aitsür. Ethanol policy ajanga politicians-ibo tajangzü.

E20 policy ajanga foreign exchange savings, farmer income, aser lower emissions tajangzü agütsür ta Centre sorkari ashir, saka Jantar Mantar nung gari kiburtemi tashishitsü meli inyaksangshitsü aser pei sasa mulungteta amshitsü temeten agütsütsü takhangba agütsür.

Tanü lungkak aitba sentongji tila ka dang asütsü akok saka khuretttem lemsatapba ya bangdakpurtem mangashii ang meyütsütsü südi.

Guwahati nung BRICS anti-drug agency senden amentsü



Guwahati, July 5, 2026

(Agencies): July 6 aser 7 anogotem Guwahati nung BRICS Heads of Anti-Drug Agencies Meeting amentsü. Iba senden nung linük tenet nungi narcotics enforcement ketdangsürtem adentsü.

Iba senden ya Ministry of Home Affairs kübok Narcotics Control Bureau (NCB) ajanga ayonga amentsü.

Tanü synthetic drugs, New Psychoactive Substances (NPS), darknet-enabled trafficking aser cryptocurrency ajanga ozüng amer nem tayongzüka balala agütsüba mapang ka iba senden amentsü.

Iba senden nung Brazil, China, Egypt, Ethiopia, India, Indonesia, Iran, Russia, Saudi Arabia, South Africa aser United Arab Emirates nungi ketdangsürtem adentsü.

Iba senden atema Guwahati shimtetba ya kanga tongtipang lir kechiyong iba yimti ya Bangladesh, Bhutan aser Myanmar den India international borders anasa lir.

Mapang talangka Northeast ya "Golden Triangle" region ta ajaba anasa aliba ajanga transnational narcotics trafficking ajanga kongshia lir. Alima nung

ozüng alema drug yangluba tesemtem rongnung "Golden Triangle" ya densema lir.

Ozüng amertemi Northeast nung heroin, methamphetamine tablets aser synthetic drugs kanga apuba indang osang lemsatapa arur.

Iba tangatetba nung India-i international cooperation against organised drug crime nung Guwahati ya tongti tesem ka ama züngshir.

BRICS senden nung synthetic drugs anema inyaksü, precursor chemicals belenba noktangtsü, ozüng amertem tsünga intelligence-sharing & operational coordination akangshitsü aser training & technical cooperation ajanga rejutem tajungba akümtsü indang onüktem tongti süa jembitsü.

India-i narcotics anema maparen ulushia inyakba mapang ka nung iba mungdang amungtsü. Centre sorkari tawa tu Vision Document on Narcotics Control (2026-2029) sayaogo aser iba nung institutional capacity akangshitsü, prevention, rehabilitation aser public awareness initiatives dena ozüng akangakanga benshitsü nükjidong lir.

Guwahati summit nung Joint Declaration ka renema sangdongtsü aser iba nung transnational drug trafficking aser substance abuse anema inyaka aotsü asoshi BRICS linüktem tsünga amalitep akangshitsüba densemstsü.

Assam Legislative Assembly nung Hindi benoker

Guwahati, July 5, 2026

(Agencies): Assam Legislative Assembly nung Assamese, English, aser Bodo den külemi official language ama Hindi benoktsü ta Assembly Speaker Ranjeet Kumar Dass-i ashi.

Hombar nungi Budget Session tenzüksü lia Deobarnü Guwahati nung Dass-i osangbener den jembidang yashi general purpose committee meeting nung iba lemtet agiba lemsatap.

"Yashi general purpose committee senden menogo. Idangji Assembly nung Assamese, English aser Bodo den külemi Hindi benoktsü lemtet" ta pai ashi.

Iba senden nung sorkar teloktep nung adenertem aser

Opposition nungi teshimtet nübotem aden ta Speaker Dass-isa ashi.

"Senden nung Parliamentary Affairs Minister Pijush Hazarika, Minister Keshab Mahanta, Opposition Leader Wazed Ali Chowdhury, MLA Kamalakhya Dey Purkayastha, MLA Sabharam Basumatary, MLA Chakradhar Gogoi aser MLA Joy Prakash Das nunger liasü. Taoba nung oshi asem- Assamese, English aser Bodo liasü aser tang mezüng atema Hindi oshi benoker" ta paisa metetdaksü.

Hindi ya 'Rashtra Bhasa' lir aser iba jagi akhümtsüba agüja Assembly nung benoktsü lemtet ta Dass-isa shisem.

ALA TV ajanga Assembly indang session sayur aser iba ya

Assam Bidhan Sabha TV ta nüngja melentsü lemtetogo ta paisa ashi.

Külen, Assam Chief Minister Himanta Biswa Sarma-i Assembly official language nungi Bodo agientsü akok ta jembiba atema jangjatsüogo.

"Assam nung sobaliba aser maitsü nung Bodo oshi ya kodanga pilaa moutetba shilem ka lir. Iba nung Bodo nunger putiotsü, inyaksangshi aser taginübatem dena lir aser asen temeyoktep state jangjatsür" ta pai ashi.

"Assam sorkari Bodo oshi wazüka ayutsü aser ajungkettsü. Onoki akokba tashi iba oshi renloka aotsü aser tarutsü pututem asoshi kümzüka ayutsü" ta CM Sarma-isa ashi.

VB-G RAM G Act atema Rs 25,000 crore agütsüogo

New Delhi, July 5, 2026 (TYO):

July 1, 2026 nungi Viksit Bharat - Guarantee for Rozgar and Ajeevika Mission (Gramin), VB-G RAM G Act, 2025 mapa tenzükogo ta Union Minister of Rural Development Shivraj Singh Chouhan-i metetdaksüogo.

Deobarnü Union Minister Chouhan-i video conferencing ajanga iba Mission kübok Rs. 25,000 crore tema agütsüogo aser iba ya state ajak asoshi first installment (Mother Sanction) lir.

Paisa State aser Union Territory ajak nungi Rural Development Minister tem den

VB-G-RAM-G maparen inyakba meyipa reprangshi.

State sorkartemi anogo 15 tsünga taa agütsütettsü atema tanü first installment agütsür. VB-G RAM G Act ya Mahatma Gandhi National Rural Employment Guarantee Scheme nungi melenzükba lir ta Chouhan-isa metetdaksü.

"MG NREGA mapa kuma inyaksü atema küm asem tema agi saka VB-G RAM G yabo linük ajungalen anogo ka nung dang mapa tenzükogo. Iba Act kübok taruba küm pungu tsünga Panchayats lakh 2.86 nung Rs

7.5 lakh crore agütsütsü aser iba ya Viksit Bharat mangdang dak sendakba maparen tuluba inyaka aotsü atema lir" ta paisa ashi.

Tan ita hopta mezüngbuba nung Gram Panchayats aika nung maparen tenzükogo aser rural workers lakh aika nem mapa agütsüogo ta Union Minister Chouhan-i ashi.

VB-G-RAM-G kübok wage rates 10% agi teimba kümogo. Linük nung state kecha nunga anogo ka nung Rs 300 teküpok mangutsü aser VB-G-RAM-G inyaka aotsü atema senotsü peria dang agütsütsü ta paisa shisem.

PPC district level orientation-cum-meeting ayongzük



PPC district level orientation-cum-meeting ayongzük aliba mapang tangokba noksa angur.

Dimapur, Chiteni/July 05 (TYO): Gram Panchayat Development Plan (GPDP) 2026-27 renemtsü atema People's Plan Campaign (PPC) District Level Orientation-cum-Meeting ka July 3, 2026 nü Deputy Commissioner, Mokokchung indang Conference Hall nung ayongzükba liasü.

Iba sentong nung Imyapangla, Project Director, DRDA, Mokokchung menden liasü aser Deputy Commissioner, Mokokchung, Ajit Kumar Verma, IAS-i iba sentong ayongzükba rateta jembia liasü.

Pai jembidang, Gram Panchayat Development Plan (GPDP) ya ajaki shilem agiba 'convergent planning process' ka lir aser yangji stakeholders ajungai shilem tajung agitsü nüngdaker, ta ashi.

Yimtsüng terenlok asoshi

sorkar indang scheme tajungtiba nung mapa kuma inyaksü asoshi pai sendaktepa aliba departments ajunga dang teka amteper inyaksü ajungshia liasü.

Sentong yangluba nung sendaktepa aliba departments temi tongtipang shilem agiba indang lemsatepdang Deputy Commissioner-i department ajunga dang yimtsüngtem nung tongtipang aser nüngdakatam awajemtsü mechi department shiai pei schemes, programmes, technical expertise aser resources tem agütsütsü ajungmesoa liasü.

Iba senden nung Imchatemsula Changkiri, DPM (RGSA), DRDA, Mokokchung ajanga PowerPoint presentation ka agütsüba nung Gram Panchayat Development Plans renemdang lenla ajak nung kongshia, nüburtemi shilem agia, ochishia aser

lokteper inyaksü tongtipang ta ashi.

Sensaksema mapang department balala lungjemer Gram Panchayat Development Plans tajungtiba nung renema aser mapa kuma inyaksü pangjemtepa liasü.

Project Director, DRDA, Mokokchung ajanga jembidang, People's Plan Campaign asoshi Rural Development Department ya nodal department ka amai lir, aser Gram Panchayat Development Plan (GPDP) takok angutsü asoshi sendaktepa aliba department ajungai shilem agitsü, amalitep akatsü aser kibur ama bilema inyaksü nüngdaker, ta ashi.

Lai department ajunga dang grassroots level nung lenla ajak nung kongshia sentong yanglutsü asoshi department ajunga lungjemer maneni inyaksü ayongzükba liasü.

Assam Rifles-i Noklak nung sentong ka ayongzük

Dimapur, Chiteni/July 05 (TYO): Shamator Battalion, Assam Rifles ajanga Noklak nung Ex-Servicemen Interaction and Medical Camp ayongzükba liasü.

Iba sentong nung Ex-Servicemen aser Veer Naris 50 arua shilem agia sepai tejen temi parnok den sensaksemtsü, metokmeperi lemsateptsü aser teyari balala agitsü maongka angu.

Iba mapang Assam Rifles indang Officiating Commandant aser tanishir temi anir sensaksema akokba lenmag ajunga nung yaritsü ta ashi.

Kasa mapang medical camp

ka ayongzükba temang reprangba den medical consultations agüja liasü.

Iba sentong nung banking assistance, grievance redressal, CSD Smart Card dak sendakba services aser süngojemtsü renema agüja liasü.

Asür Pashen kinungtsü nem parnoki CSD Smart Card renema la nem amoktsü.

Iba ama sentong ayongzükba ajanga Assam Rifles aser sepai tejentem tsüngta tesendaktep tali akangshi aser parnoki Ex-Servicemen aser Veer Naris asoshi maneni mapa tajung inyaksü ajungshitepa liasü.

NIEDO nung azünger kaketshir temi Meghalaya semdang



Dimapur, Chiteni/July 05 (TYO): National Integrity and Educational Development Organisation (NIEDO), Capt (Late) N. Kenguruse, MVC Centre of Excellence & Wellness, Chieswema, Nagaland indang Batch pezü buba kaketshir temi Educational cum Exposure Tour nung shilem ka ama Cherrapunjee, Meghalaya semdanga liasü.

Iba sentong ya Assam Rifles temi kaketshir tekolok shisatsü ulushidaktsütsü aser takum nung tajangshiba tasen ngudaktsütsü nükjidong nung yongzükba liasü.

Iba tour mapang kaketshir temi Mawsmi Cave, Seven Sisters Falls, Thangkharang Park, Eco Park aser Elephant Falls densema tourist temi sapuba tesemtem sema jaja.

Iba tour ya ajanga keketshir temi libajen wazüka ayutsüba, sobaliba mesamadaktsüi amshitsü nüngdakba tali rajema angateta liasü.

Iba sentong ya ajanga Assam Rifles temi lanurtem nem shisaliok ajanga tashi agütsütsü temulungtetba aliba aser senso tajung ka-ka kumdaktsütsü ajungmesoa inyakba sayur.

Kohima nung asem buba Unscripted sentong ayongzük



Dimapur, Chiteni/July 05 (TYO): Writers Collective Kohima ajanga The Bookhome, Billy Graham Road, Kohima nung Honibarnü asem buba Unscripted sentong ayongzükba kakets zülur, kenshi oshi jangrar, PenThrill Publication house nung interns agirtem adenshia shilem agi.

Naga nung oral literature, puti otsü aser sobaliba tajung wazüka ayutsü nükjidong nung iba sentong ya ayongzükba, kong tebang agi otsü ashiba

nung temulung tali agütsür.

Iba sentong nung kakets zülur, sangro mejemer aser Writers Collective züngsem Dr. Avinuo Kire menden liasü. Writers Collective nung tongti zülur Dr. Vizovonuo Elizabeth-i sentong tenzükba jembidang Unscripted tenzükba otsü lemsatep aser mezüing edition ana dang Open Book ta jaa liasü saka mangdang tajungba yur Unscripted agi melen ta ashi.

Iba sentong ya Naga nung tebu-teti Medoselhou

Keretsü-i otsü ashiba sentong ka liasü, shibai sobaliba yimya, kiyimba, külem-kija, aser sempet ain balala nung amangba indang lemsatepa liasü.

Iba sülen Q&A mapang liasü aser iba mapang shilem agirtemi o jembir sen sensaksema tebang agi otsü ashiba indang lemsatep.

Sentong tatemi PenThrill Publication House nungi interns tembanger nisung ana nem kulizüing kakets agüja liasü.

Aghunato nung Census atema shisadokden senden amen

Dimapur, Chiteni/July 05 (TYO): Census exercise dak sendakba nung shisadokden senden ka ADC Aghunato indang office nung July 4, 2026 nü mena Census department, town councilors, ward GBs, supervisors, enumerators aser lokti tentet balala nungi lenirtem adenshia liasü.

Iba senden amenba sülen Census dak sendakba nung mangatetba tem rajemshitsü asoshi sensaksema mapang liasü.

Deputy Director, Census and team leader, Imkong-i Census ya phases ana nung agitsü ta metetdaktsü aser data tejangja bendentsü ayongzükba aser iba mapang osang balala bendenba ajanga tarutsü nung

sorkar indang inyakyim balala nung tongti shilem agitsü ta ashi.

Pai nüburtem dang Census ketdangsurtem den amalitep akatsü ayongzükba liasü.

EAC Aghunato, Kathyinla-i pela agizükba o jembidang sub-division nung House Listing Operation (HLO) agiba indang osang tongmelang agi lemsatepa liasü.

Aghunato ya Census charges pezü kuma lemsar iba exercise agitsü asoshi supervisors aser enumerators 89 shima lir ta lai ashi.

Lenmag majungba aser mobile network coverage tashi maitba amala timtem liaka HLO tajungtiba nung inyaka otar, ta EAC Aghunato-i ashi.

E20 ajangagari gol meraksar saka 'mileage' ajemakümdaktsür



New Delhi, July 05, 2026: Petrol nung ethanol shilem 20 meyokteptsü (E20) policy benokba anema Entrepreneur & television personality, Tehseen Poonawalla den tangartemi Jantar Mantar nung longkak aitba noksa nung angur.

New Delhi, Chiteni/July 05 (Agencies): Sorkari petrol totzü nung ethanol shilem 20 meyoktepba dak sendakba nung sorkar pusema gari yangluba company temi, ethanol ajanga gari gol raksaba kuli mali, ajisüaka 2023 küm jakdang yangluba garitem nung totzü atsükba shilem 3 nungi 3.5 ajema kümdaktsür, ta metetdaktsü.

Maruti Suzuki India, Toyota Kirloskar, Bajaj Auto, TVS Motor, Hyundai Motor India aser Hero MotoCorp nungi senior executives-i Honibarnü osangbenertem den jembia liasü.

Tasüngdangba ka

langzüdang Maruti Suzuki India nungi Rahul Bharti-i, 2025-26 küm parnoki gari crore 2.8 servicing sütsüogo aser item gari nungjagi crore 1.5 bo yanglur küm asem dak tali garitem lir (certified E20 compliant vehicles masü), ta metetdaktsü.

"Item gari nung E20 totzü atzükba ajanga gari nung timtem adokba kuli onoki mebushtet. Onok indang labs nung tendangba dak alia field experience-a junga liasü. Ibaji ajanga onoki customer tem dang timtem kecha mali, ta shiteter," ta pai metetdaktsü.

Gari industry temi sorkar

dang gari tasen alizükertemi tamang katettsü atema petrol nung ethanol shilem 20 meyoktepba ya taruba küm 10-15 tashi kasa dang alitsü mepishitsü asü? ta asüngdangba langzüdang Toyota Kirloskar Motor nungi Vikram Gulati-i, "IMC (inter-ministerial committee) aser gari auto industry den stakeholders-i sorkar den jembidar. Flex fuel vehicles (FFVs) atema temepishiba benoka lir. Market nung FFVs aika ayoktsü, aser iba ya alima tesem ajaklen puteptsü. Iba atemaji sorkar den jembidar," ta metetdaktsü.

Ram tekülem ki tenla auyaba atema opposition-i BJP aitsür

New Delhi, Chiteni/July 05 (Agencies): Uttar Pradesh kübok Ayodhya nung Ram tekülem kidang tenla auyaba dak sendakba nung Amongnü Shiv Sena UBT tongti, Uddhav Thackeray-i "Hindu nungertem dang nungi auyartem ya tashi nung alirtem lir, aser iba ya kanga tia maka," ta metetdaktsü.

Hindutva politics aija Thackeray-i, "Parnoki Ayodhya ya tetenzüker dang, kechiyong Kashi aser Mathura-a arutsü ta shiogo; yangji auyaba atema ni tebilemtsü katsür," ta metetdaktsü.

Paisa, "Kari dang Hindutva tim mesüi amshia tekülem kidang nungi auyara, Hindu nungertemi parnok dang tai matoktsü," ta metetdaktsü.

"Asenok ya tesashi, tai maket aser linük meimba Hindu nungertem lir ajisüaka sowarbo masü," ta paisa metetdaktsü.

Ram tekülem kidang tenla aruba senotsü crore aika den sen crore aika jenjang sentioset aika samaba atema Shri Ram Janmabhoomi Teerth Kshetra Trust aija arudar.

Amongnü Congress Tir, Mallikarjun Kharge-ia Ram tekülem ki atema aruba tenla sen crore 20,000 auyabaji BJP aser RSS den sendaktepa lir, ta metetdaktsü.

B R Ambedkar indang kürakyanglu ka sayaba sülen jembidang Kharge-i, yimtenren nung tajangzüik angutsü atema BJP-i yimsü amshir, iba denji külemi democratic rejutem jenjangraksatsür, ta metetdaktsü.

Kharge-i, "Tsüngrem tenüng amer senotsü jenti auyaba nenoki nguogo. Ayodhya nung kechi atalok? Sensakertemi auya asü? Dalit nungertemi inyak asü? Aluyimertemi asü? Masü. Iba ya RSS aser BJP den

sendaktepa alirtemi inyakba lir," ta ashi.

Rajya Sabha nung opposition lenir Kharge-isa, Ayodhya nung aliba Ram tekülem kidang sen crore 20,000 jenjang auyaogo, ta metetdaktsü.

"Ram tekülem ki tenüng nung tenla agütsüba hon, tariba aser sentioset aika auyaogo. Anogo shia parnoki Tsüngrem tenüng tetshir, ajisüaka Tsüngrem tenüng amer parnoki auyar," ta paisa metetdaktsü.

"Parnoki (BJP/RSS) votes auyar. Parnoki Tsüngrem tenüng amer rongsen auyar, aser yimtenren nung alirtemi tashi angutsü atema kasaji inyaker. Item ama tim masübatem nokdangtsü atema Babasaheb Ambedkar-i linük temzüng ya yanglu. Nenoki longjemer linük temzüng mita melira nenoki ochi temeden mangutsü," ta paisa shisem.

Prashant Kishor-i Bankipur assembly by election nung tokteptsü

Bankipur, July 05 (Agencies): Jan Suraj Party tentetsang, Prashant Kishor-i Bihar kübok Bankipur Assembly by election nung tokteptsü aser iba ya state nung BJP-i aniba sorkar atema "referendum" ka asütsü, ta pai metetdaktsü.

Patna nung osangbenertem senden ka nung Jan Suraj Party Bihar unit Tir, Manoj Bharti-i, taoba hopta Election Commission-i by election atema sangdongba sülen party core committee senden amenba mapang nung Bankipur Assembly by election nung Kishor toktepdaktsütsü atema telemtetba agi, ta metetdaktsü.

BJP National Tir, Nitin Nabin Rajya Sabha nung züngsem shimba ajanga Bankipur assembly menden ya azüngteta liasü.

Osangbenertem senden nungjisa Kishor-i voters dang pa yariang ta mepishia,

"Bankipur nung alirtem ya Bihar nung takartibatem aser shisaliok tajungtiba akartem lir. Parnoki tajungtiba nem vote agüjang. Parnoki kü dak tamang katetra kü nem vote agüjang ta ni mepishir. Assembly nung ozü party nungi MLA ka dang süaka ni tanüngba MLA 242 dang nungi alakteta inyaktsü," ta metetdaktsü.

Kishor-isa, BJP lenir Samrat Choudhary ya nüburtem vote ajanga chief minister akümba masü, kechiyong 2025 küm Bihar Assembly election nung NDA-i JD(U) Tir, Nitish Kumar lenisüba nung toktepa liasü, ta metetdaktsü.

Paisa, "Taruba by election ya Samrat Choudhary-i aniba ita ana BJP sorkar asadangba mapang ka asütsü. BJP-i takok ngura nüburtemi maneni parnok pusemer ta ni agizüktsü. Ni takok ngura ibaji parnok sasa asadangtsüla," ta ashi.

Sonam Wangchuk temang touzük seret 6 ajemogo



July 05, 2026 nü Jantar Mantar, New Delhi nung longkak aitba tesem nung Cockroach Janata Party (CJP) tentetsang, Abhijeet Dipke, Dehradun nung soseta asüba NEET candidate, Ria tebu (ajichilen nungi tanabuba) aser tangartem noksa nung angur. Kasa noksa nung anogo aika lumia longkak aitsang, climate activist Sonam Wangchuk mejanga aliba angur.

New Delhi, July 05 (Agencies): Cockroach Janta Party (CJP)-i Delhi nung aliba Jantar Mantar nung longkak ait tenzüka sülen Amongnü anogo 16 jungogo aser climate activist Sonam Wangchuk-ia lumia longkak aitba sülen anogo 8 jungogo.

Anogo 8 tashi lumia longkak aيتدang pa temang touzük seret 6 ajemogo.

Doctor temi ashiba agi, Wangchuk mejangba position nung blood pressure 112/70 mm Hg liasü, temelungjang rate minute shia 72 beats liasü aser blood sugar 67 mg/dL liasü.

Doctor temisa, tang tashi nungbo pa temang nung tzü peria lir, temelungjang-shisatsü yakyaka lir saka temang touzük seret 60.95 dang kümogo, ta metetdaktsü.

NEET exam paper leak asüba sülen ano paper aika leak asüba aser examination inyakyim meshidakba anema June 20 nungi CJP-i longkak aita education minister Dharmendra Pradhan menden nungi anenang ta akhanger.

Honibarnüa CJP-i yimjak nung shidi ka ajanga Ato kilonser

Narendra Modi dang iba dak sendakba nung pai jembitsüla aser Pradhan anentsütsüla, ta takhangba agütsü.

Iba shidi nungji CJP tentetsang Abhijeet Dipke den party office ketdangpurtemi sign süa lir.

Shidi nungji yamai zülua lir, "Onoki tesüiba anogo 15 tashi Jantar Mantar nung longkak aiter, aser shisashir Sonam Wangchuk-i lumia longkak ait tenzüka sülen tanü anogo tenet abensar. Ner sorkari kobika onok ola sendoktsü?"

CJP leniba nung longkak aitba ya lenirtem, lokti tentettem aser kaketshirtem organisations aikati pusemdar.

Aluyimertem tentet Samyukta Kisan Morcha-ia July 7 nü longkak aitba nungji shilem agitsü atema Jantar Mantar-i telok ka yoktsü.

All India Students' Association züngsemtemia lumia longkak aitar.

Jawaharlal Nehru University Students' Union joint secretary Danish Ali bo lumia longkak aيتدang blood sugar level kanga ajema akümba sülen hospital-i anir ogo.



July 5, 2026 nü Gajraj Corps, Sela Warriors aser National Institute of Mountaineering and Adventure Sports (NIMAS) züngsemtemi Bajrang tenem kolak (5,583 metre) atongba sülen tangokba noksa nung angur.



TIR YIMYIM YIMOBILEM (EDITRIAL)

DIMAPUR MONDAY, JULY (CHITENI) 06, 2026

Yi ayokertembo mangur !

Tawa Dimapur nung yi ajemdak 'bar' ka nung kaketshir lenir kati oset raksaja timtem agütsüba dak aketba maparen nung Nagaland police asoshi teratatsü ka ajurubaji yi ayoksangji aputsü asü mesüra yi ayokdak sen meshia oset raksatsüsangji aputsü ta asüba maparen aser ken o ya asütsü. Par shishilembaba kidang oset raksatsü nungji, iba yi yoka chia ajemdak, bar, kiburi oset raksatsüsang anemaji police nem ken o agüja lir. Atangji pi kidang oagi ki oset raksatsü nungji paji aputsüla saka ano pa anema ken o agütsüsang yi ayoksangjia ozüing raksar ka lir, kechiyong Nagaland nung yi ayoktsü memelar. Ano, ibajiang ken o tuluba aotsüsa anendaka lir, ajisüaka tang tashi nung Nagaland nung yi yoka chiajemdak lapoksang anemabo shingaia ken o benoka mali aser police-temia iba ama ozüing raksaba mapa anema ken o benokbabo mangashi. Atangji, tajemertem asoshibo yiji chiyongtsü tajung ka dang lir, anungji tanga lima nungbo yia yanglur, tayoka ayoker aser tajema ajemer. Ajisüaka, Nagaland nungbo yi ya temesepba chiyongtsü tamajung ka ta züingshir, anungji Nagaland nung yi yanglutsü aser ayoktsü memelar. Ibayongji tayoker aser tajemertem asoshi chiyongtsü tajung ka dang süaka yi ayokba mapaji ozüing raksaba mapa ka lir. Aji oda, tawa Dimapur nung atalokba mapa ya ozüing raksaba mapa inyakba tesem nung ozüingi memelaba mapa inyakba ka asütsü. Nagaland nung Naga nunger asoshi tia majung, yi meyanglutsü aser mayoktsü asoshi ozüing lateta liaka tesem ajak nung yi talubosa angur, kechiyong Naga nungertemi yi majem maremer aser mayoka maremer. Ano, yi bottle kisüing ayokba tesemtem dang masü saka item tesemtem dang nungi taoba, talisa, Dimapur nungbo yi jemdakja tsüingsangdak, bar, aika lapoka lir. Item rongnung ka nung atalokba indang tanüa yangi lemsateper. Aji oda, item yi jemdak tesem. Bar, lapokertemji telungjem tenteta lir aser parnok 31 tashi agi kaketshir telungjem nem tenla terara sarutepa agütsütsü asoshi telemtetba agiba dena parnoki metetdaksüogo. Ibaji kaketshir telungjem asoshi tepelatsü osang kabo masü saka yimjak nung maksü achitsüba mapa ka lir. Aji oda, kaketshir telungjemtemi iba ama ozüingi memelaba mapatem ajanga kong lanurtem taküm raksar, item tesemtemji shibangang ta akangtsü melen item nungi jagi dang tenla meshia agitsübaji Naga nunger kaketshir aser lanurtem ajak asoshi maksü aser tejashitsü osang ka asütsü. Atangji, iba ama yi jema tsüingsangdak lendong timtem adoka yimjak nung jembitep dang, yi yanglutsü aser mayoktsü anemer arogo mungdangtem olabo mali na ta rataa bilemer. Arogoi ola madokba dang masü saka Bar 31 tashi lapoka aliba yimjak nung metetdaksüaka, parnoki inyakba ozüing raksaba mapa anemabo, government-ia ola madoker, anungji police-temia mangu aser mangashi ama dang toktsür ta asüba yagi Dimapur nung lapoka aliba Bar 31 ya parnok kiburtem meyong dang masü saka kaketshir, arogo aser police-tem ajak külem meyong amai dang bilemstsüsa kümogo. Ashiko, Bar 31 jagi kaketshirtem nem tenla agütsüba amai police aser arogo nema tenla agüja alitsüa akok, kechiyong amang agi sangwa küma yimti nung mungdang ama adenshia yi jemtepa tsüingsangaka aser yi ajemdakji ki oset raksaja lendong atalokaka, ajaki oset raksatsüsangjibo angur saka yi ayoksangjibo mangur. Iba jagi yimtenia aser arogoia yi ayokdak lapoka jemdaktsüabajibo kecha masüa, junger , ta ashir amai akümer. Atangji, yimteni ozüing shitak mamshiteter aser arogoia arogo nunger yi ajemba menokdangteter ta süra kanga junga ano khen bilemdangtsü nüngdaker.

OLEMSABANG

Tzülu nung aih madokdaksütsü atema inyakba yimya

Courtesy: Fostering Climate Resilient Upland Farming Systems (FOCUS), Nagaland.

Aih ya nüngdak maliba süngdong ka lir koba ali telunglen nungi meyia adoker aser ali temo aika agir aser tsünüsempongtsü tsünüa aliba nung meiner. Tenem nung aih ajanga tebilemstsü tulu agütsür, iba aliba ajanga tsünüsembongtsü adokba tajemba kümdaktsür. Aih ajanga tsünüsembongtsü tajemba kümdaktsübaji 34 nungi 90% lir, ibaji tsünüsembongtsü koba amala iba dak aket.

AIH NUNGI KÜMZÜKA ANEPALUBA

Aih nungi kümzüksüji tesem, alu tulu aser tila ajak nung aih tedong tasen arua adokba/meyiba nungi kümzüka anepalutsü atema lir.

Aih aika meyiba nungi kümzüksü atema tongtimbang teinyaktsütem:

Metsü yokdang aih tejang den meyokteper aliba tejang meyoktsü merangang.

Nashi/napongtem nem aihji chidakjang aser ai tulutemji shiruru nem agütsütsü atema amshiang.

Ongken tur ali temo inokdang aih meinoktsü kümdangang.

Alu merükba osettemji alu ka nungi kati bener maodang kanga junga merükang.

Lungsang, lisem aser alitem aih aika aliba tesem nungi bener arua tamshi.

Metsü rema aliba tesem nungji aih tejang, shi amala ali mali maneni semdanga reprangang.

Tzülando yanglua aliba tesem, atsü, aser tsünütsü meyoki aliba tesemtem merükmerüka yuang.

AIH MEMEYIDAKTSÜTSÜ ATEMA ANEPALUBA

Aih memeyidaksütsü atema anepalubatemji itemi tena lir:

Cultural

Physical

Biological

Aih memeyidaksütsü atema sobaliba/tetsütebu nungi amshia aruba

Tsünüsembongtsü tajung amashiba: Metsüjang tajung amshiba yimya, mapang shitak nung tsünüba yimya aser tsünüsembongtsü aika mesüra ishika koba aika meyia aliba nungi atsütoker, itemji kanga tongtimbang lir.

Tashi aittsü mozü agütsüba: Aih meyiba mapang nung tsünütsü tashi aittsü mozütem teinoktsü. Tsünütsü atema mozü tejang zünga alidak inoktsüba ajanga tsünütsü junga indaktsür, iba ajanga metsüjangji dang junga indaktsür. Metsü zünga aliba tema nung tsünütsü junga aintsü atema inoktsüba mozüji inoktsüdang mozüji teimbaka metsü-jang jagi agitsüsa inoktsütsüla.

Tsünütsü melenteba tsünüba: Temesüktep tsünütsü melenteba mapang talangba tsünüba ajanga ai tebilemstsü adokdaksüba nungi kümzüker kechiba ta süra iba ajanga tsünüba tesem nung tsünütsü tanga ka atsüdoktang aih atsütoker. Tsükji totzü adokba/aketba tsünütsü (rapeseed, sesamum).

Somomo, alo, wheat yamala item den melentepa tsünütsüla. Iba ajanga ai meyiba nungi kümzüksü akok. Süngdong loli (Cowpea), black gram, lathyrus, amala. Item amalaji alu nung tsük ror ali tazüing aliba nungji tsünütsü akok, aji ta süra tesem tazüing alibaji tsünütsü agi asüngtsü aser aih meyitsü atema mesatemi akümer. Süngdong loli (Cowpea), batem (groundnut), potma (red-gram), black gram, azüzküingken, matsük lashi (lentil), linseed, yamala. Item tsünütsütem ya melentepa atemba ajanga aih meyiba nungi kümzüker.

Metsü yoktsü tesem yateta yangluba: Metsü mazüngdang metsü yoktsü tesem yateta yangluba ajanga aih meyia aliba 1-2 tashi merüktettsür. Tamasa junga renemer aliba luji tzüinglu mesüra tzülando ajanga jungjunga metentsü, aser aiji mekoteta adokdaksütsü. Metsü yoktsü aliba tesem nung ai mokoteta alibaji tulu makümdang merüktettsü. Aih indokliji dang tsünüsembongtsüji yoktsüla.

Anü tatsük amshia ali atsüka kümdaktsüba: Ali indang temperature-ji teti aliba dang nungi 5-10°C agi tatsükba akümtsü iba atema ali tema nungji plastic tapu aser atetpoka anguba plastic agi aliji meyibanga ayutsü. Plastic tabak agi meyibanga aliba ajanga iba telung nung koda tatsük kümdaktsür ibaji ajiteter aser iba ajanga tashi samaba nungi kümzüker aser iba telung nungji tango adokba ajanga atsükatsüka kümdaktsür. Kanga tatsük asüba ajanga aih kar meyitsü aliba tepseter.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Punjab nung pastor ka anema ken o benok; Tenla ki rongdoktsü



Pastor Prakash Singh (abelen), Pastor Puran Shafri (tiyong) aser Punjab State Minority Commission nung Chairman, Jatinder Masih Gaurav nunger noksa nung angur.

July 05, 2026: Punjab state kübok Amritsar district nung pastor ka anema benokba sülen pai ki toktsür ajen aser June 14 nü pastor ki den Tenla ki rongdoktsüba atema pastor kinüngtsüi Sikh nunger ka anema ken o benokogo.

Nisung kati arrshi küm 46, pastor Prakash Singh den Arogo nung züngsem kar anema May ita nung ken o benoka liasü, iba sülen pastor-i ki toktsür ajen.

Pastor Singh ya Nawa Pind yimdak alir. Par kiyonger Sikh nunger 'Kalu' ta ajasang Jaspal Singh-i Khristan yimsü kanga aija liasü aser Khristantem yimdak nungi meindoktsü ta aiben amokmerena aruogo.

Kalu-i, nenoki yim toktsür aotsüla mesüra onoki nenok yangi tesünep nung melidoktsütsü, ta pastor kibong amokmerena liasü.

May 18 nü Kalu aser Arogo nung züngsem, Rahul na tsüngda mangatettep adoka liasü. Iba sülen Kalu-i Jandiala police station nung Pastor Singh aser par jabaso Anand Singh na densema nisung 9 anema ken o benok. Iba sülen May 28 nü First Information Report (FIR No. 163) benoka liasü.

Pastor Singh-ibo, May 18 nü raratepba anogo nungji pabo kisüjensüba tesem ka nung aayanga liasü, ta metetdaksü.

Pastor-i Kalu'er adianu ka ajurua kechiba FIR nungji pa den par jabaso na tenünga züngok, ta asüngdang?. Iba mapang nung Kalu'er adianu jagi nenatibo shilem agia mali, ta onoki meteta lir ajisüaka nenok kidangi meyipa arura ner kibong dak azüksü ta

amokmeren.

Osangbener den jembidang All India Christian Samaaj Bhalai Dal (Amritsar) Chairman aser pastor Puran Shafri-i, "Mangatettep adokba tenüng amer Kalu-i metetsümonga Pastor Prakash aser par jabaso nata FIR nungji züngok. Kalu'er adianui pastor aser par jabaso nabo mangatettep adokba nungji tena mali ta langzüba ola recording kuli onok ket nung lir," ta metetdaksü.

All India Christian Samaaj Bhalai Dal telok yagi Punjab nung Khristantem temeden atema inyaker.

Shafri-isa, tamalen-a Kalu anema ken o aika benoka lir; temesepba mozü shibelenba, Arms Act anema inyakba aser tanga aibelen balala atema pa anema ken o benoka lir, ta ashi.

June 14 aonung 7:00 ako meta pastor Singh'er kibong kidang maliba mapang nung Tenla kidang aser par kidang mi senoktsüba osangji kiyongertemi metetdakja liasü. Kiyongertem aser fire brigade department nungi sepaitem arua miji enseptsü.

Pastor kinüngtsü Paramjit Kaur kidangi meyipa arudangbo kidang mi senoktsüba ajanga furniture, osettsüset, tongtibang documents, Laishiba 16 aser Khristan kakettek den kongki aika rongdoker liasü. Iba dak alia kidang nungi sen 15,000 shi auyadoker liasü.

La kidangi meyipa aruba mapang nung Kalu par kima liasü aser pai la dak lungro kati aon; iba sülen la police station-i oa ken o agütsü.

Forensic team ka arua

bushisüngdangba ajanga ki arongbaji electrical short circuit ajanga masü ta bushitetogo.

June 16 nü Kaur-i ken o agütsüba nung ajemdaker Kalu anema FIR No. 192 benokogo.

Pastor Singh-i ashiba agi, Kalu-i kilem kolak ajanga ki telungi aiba sülen toztü shiloktsür mi senoktsü asütsüa akok, ta metetdaksü.

Shafri-i Punjab's Sacrilege Law kübok Kalu anema ken o benoktsüla, kechiyong pai yimsü dak sendakba kakettek rongdoktsüogo, ta metetdaksü.

June 28 nü Pastor Singh, Kaur, Shafri aser Khristan lenirtemi Punjab State Minority Commission chairman, Jatinder Masih Gaurav ajurua temepishiba shidi ana agütsüogo.

Mezüngbuba temepishiba nungji FIR 192 nüngji özüng kübok Arrla tapet kar bendenloktsüla ta mepishia lir.

Kaur-i, "Mi senoktsüba ya Kalu ta ajasang Jaspal Singh mapa lir ta onoki bilemer. Iba ya Khristan yimsü sempaba nung ajemdaker inyakba lir," ta metetdaksü.

Laisa Kalu tangsa apuba sülen pa anema ken o akatsüla, lar kibong nem security agütsütsüla aser yimsü dak sendakba kakettek rongdoktsüba atema temerenshi tulu agütsütsüla, ta metetdaksü.

Tanabuba temepishiba nungji Kalu-i benokba FIR nung pastor Singh aser jabaso Anand Singh na tenüngji agientsüla, ta metetdakja lir.

Iba dak sendakba ken o nung Punjab State Minority Commission-i District Superintendent of Police aser Station House Officer na dang July 6 nü Chandigarh-i arung ta tuyuogo.

July 1 nü All India Christian Samaaj Bhalai Dal den Khristan lenirtemi director general of police, Harmandeep Singh Gill-a ajurua kasa temepishiba agütsüogo.

Osangbener den jembidang Shafri-i, "DGP-i onok dang aibelenertem aputsü aser FIR nungjagi Pastor Prakash aser Anand na tenüng agientsü atema jungjunga bushisüngdangtsü ta shiogo," ta metetdaksü.

Pastor aser pa kinüngtsü na den jabaso ka aser jala ka Tenla ki mezüngbuba 'floor' nung alir. 2022 küm Pastor Singh-i iba Arogo tenzüka liasü aser Amongnü shia tamanger 35-40 shi adenshia tekülem sentong agia arur.

ANOGO ABEN TSÜNGREM DEN

Tanela temeshi yimya

"Tanela Temeshi Khristan taküm ka nung lidaktsüba ajanga Tsüngrem dena alibaji jangjatsür."

Tsüngrem atenba aser Tsüngrem den jajabaji Tanela Temeshi atenba jagi kuli asür. Tai tetsübuttsü mapa masü saka tepelatsü aser nuchi lir. Kechiaser Tsüngremi asenok nem tetsübu tanela masü saka nuchi tanela agütsü. Anungji iba temetetba akatsü jangratsüla. Iba temetetba yagi raksatsü asüba ajak yanglushitsür. Ibai tesama masü, saka tajangzük lir.

Anungji Khristan Taküm shia nung ya akatsü tenungdaksü. Ibai Tsüngrem sempet lir; tajungtiba temoatsü.

Khristan ka nem agutsüba maongkaji Tanela Temeshi tena alibaji lir. Tanela Temeshi-i asenok ajungshir, anishir, sayur aser telungjem kadaktsür. Süneptsüba dak temulung lemteta aliba tetezü - asen tashi mait teti pa nem metetdaksüba aser bendanga agütsübaji lir. Asen tashi maitji asen asoshi tsükchir tamajungtibaji lir. Saka Pai teti asen yarir.

Southern China nung ketdangsertemi pastor Jin Mingri chiokogo



Pastor Jin Mingri

July 05, 2026: Khristan pa Los Angeles tonga aruogo," melungtet telok ChinaAid-i ta China Aid-i metetdaksü. sorkar ketdangsertemi Zion Tang tashi nungbo China Church nung Pastor Jin Mingri foreign ministry-i iba dak chiokba atema pelaba sendakba osang kecha metetdaksü. memetetdaksü.

Yaküm October ita nungi Taküm May ita nung US Tir pastor Mingri ya Beihai yimti Donald Trump-i China yimtiba, nung aliba detention centres Beijing semdangba mapang nung pai China Tir Xi Jinping dang pastor Jin tekeraba nung chiokang, ta mepishia liasü, ta Jin'er jala Grace Jin-i metetdaksü.

Yaküm November ita nung Jin Mingri densema underground Arogo ka nung "China Tir Xi Jinping-i lenir 18 pua liasü. Parnoki tiyongtsüi ia meinyak asübo pa özüng alema information mechiokla, ta onoki meteta lir. networks amshir ta parnok nem Iba ya China nung tai tongloktsü. tamangertem atema temaitsü

Jin Mingri kinüngtsü, Grace-i, Zion Church nung züngsem tajung ka asütsü aser asen linük ana (US-China) tsüngda 8 bo tang tashi China nung tesendaktep tajungba akümba temaitsü ka asütsü ta onoki tepuokdak lir, ta metetdaksü. imlar," ta pastor Jin'er

kinüngertemi sangdong ka pastor Ezra Jin chiokba atema ajanga metetdaksü. ChinaAid pelar. July 4, 2026 nü

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yiprep

(n) aonung nisung ajak mejangseper (late night hours)

* Sakuba yiprep nung temang meshitaki mozü kidangi ao.

Yipru

(n) mopung tesashi aonba (storm)

* Yasüing ozü yimtak yipru agi ki aika raksatsü.

OLONG PAITEP # 7556

1						2				3
								4		
5		6				7				
8										9
								10		
				11		12				
		13								
14						15				
				16						

TIPLÉN

1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidadong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7556 TELANGZÜBA**TIPLÉN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kiochtsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüchtsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER

2026 FIFA World Cup nung Spain football team nung goalkeeper Unai Simón-i otsü tasen ka yanglutetogo aser ibaji 'longest World Cup clean sheet streak' lir. Taküm World Cup nung Spain-i Austria, Cape Verde, Uruguay, aser Saudi Arabia linüktem den asayadang Simón-i goal ka danga meidaktsüi noktang aser iba atema Guinness World Record tasen ka yangluogo.

Simón-i 519 minutes tashi asayadang Spain anema goal ka dang meidaktsü. Simón-i La Liga nung Athletic Bilbao atema asayar.

Arunachal Pradesh nung helicopter ajanga relief belener**Itanagar, July 5, 2026**

(Agencies): Hopta ka tejakdang tzünglu kanga aruba ajanga lendong balala atalokba agi Arunachal Pradesh kübok Lower Siang district nung meta talang pilar aliba yimtsüing aika den tesentaktep mali kümogo.

Tzümetsüing aser anentsüh lendong balala ajanga surface connectivity mali kümogo aser iba jagi sorkari helicopter ajanga emergency food aser medical supplies belener.

Aputem chirepba aser anentsüh ajanga lenmang shibangba ajanga Rotte, Rame, Loglu, Lipin, Mane, Tene, Sipu, Kakki, Kadu, Rina, Sido aser Korang yimtsüingtem den tesentaktep mali kümogo.

Lower Siang Deputy Commissioner-i rongdak mepishiba sülen state sorkari Skyone Airways Mi-172 helicopter ka ajanga relief operations inyaktsü lemsütsüogo.

East Siang district nung

Pasighat Advanced Landing Ground nungi Lower Siang district nung Koyu helipad tashi iba helicopter ajanga food items aser critical medical supplies belener.

Itanagar, Pasighat, Likabali aser Nari nung administration, disaster management authorities aser food safety departments dang relief materials oshizüchtsü aser alemtsü asoshi tetuyuba agütsüogo ta Civil Aviation Department-i ashi.

Nagaon district nung ASF aketba ak 55 tepsetogo**Guwahati, July 5, 2026**

(Agencies): Assam kübok Nagaon district nung July 4, 2026 nü ak 55 tashi tepseta endokogo.

Veterinary ketdangsürtemi Halowa village nung private pig farm ka nung African Swine Fever (ASF) wara aliba putetba sülen ak tepseta endok.

Arabinda Saikia indang

farm nung ASF putetogo ta Animal Husbandry and Veterinary Department-i metetdaksü.

Iba osang sangdongba sülen district administration-i Halowa village meketa kilometre 1 telongtet infected zone ta metetdaksüogo.

Maneni, iba yimtsüing nungi 10-kilometre telongtet surveillance zone ka

metetdaksüogo aser iba nung ak, akshi aser ak products ayoktsü, shibelentsü memelar ta Nagaon Deputy Commissioner Debashish Sarma-i tetuyuba agütsüogo.

District administration-i tuyuba nung ajemdaker Animal Husbandry and Veterinary Department ketdangsürtemi wara azüoktsü atema aktem tepsetogo.

Tripura CM-i NE nung mezüingbuba MEMU train tenzüchtsü**Agartala, July 5, 2026**

(Agencies): Tripura Chief Minister Manik Saha-i Honibarnü Northeast nung mezüingbuba Mainline Electric Multiple Unit (MEMU) train tenzüchtsüogo.

CM Saha-isa Tripura nung kobi melii Vande Bharat service tenzüchtsü osang lemsatet aser rail infrastructure ulushiba ajanga connectivity, trade, aser travel tajungba akümstsü ta ashi.

Tawa tu pai Union Railway

Minister Ashwini Vaishnaw den ajurutepa Tripura nung train services tajungba akümstsü mepishiba indang Dr. Saha-isa ashi.

"Anogo ishika tejaklen ni Union Railway Minister den ajurutep aser trains tajungba agütsütsü ayongzüik. Ni mezüingbo DEMU service meshi saka pai kü dang Tripura nung langka tasen ka angutsü ta ashi. Tanü asenoki MEMU train tenzüker" ta pai ashi.

Iba ya Northeast Railway zone nung mezüingbuba MEMU train lir aser Agartala Railway Station nungi tenzüker. Sentong renemba ama atalokra idak nungi Vande Bharat service ka tenzüchtsü ta Dr. Saha-isa metetdaksü.

Tripura nungi electric train services tenzükbaba ya tongtipang alizüing ka atongba lir. Iba ya "double-engine government" ajanga inyaktetogo ta paisa shisem.

United States küm 250 ajungba benjong mungogo

Washington, Chiteni/July 05 (Agencies): United States küm 250 ajungba anogo nung fireworks amshia aser anünglen tayimtsütem yimzüa mungogo, saka tzüingsang majungba ajanga benjadaktsü.

"America nunger mangdang meyipa shilangogo," ta US Tir Donald Trump-i Washington indang National Mall nung sentong ka nung ashi.

US colonies 13-i British nunger yimsüsüba tembanga 1776 küm Declaration of Independence nung meyongnem agütsüba bilemteta July 4 federal holiday ya amunger.

Benjongmung tulu ayongzüka, iba alizüng nung pa tiyong südakja benjong 'politicise' asür ta Trump aitsür.

Tir o ya ayatirm atongtsü anasa tembang aser iba mapang pai communism magizükba, pai Save America Act aser nok-nü amshitsü temeden bhukumba indang jembia liasü.

"Nüchiso anguba tajangzük talangka lidakjang. Ibagagi teti tatem maka yimsü süang.

Asenok teti tematiba nung asütsü, asenoki kodanga linük melaokdaktsütsü, aser asenok teti tajungtiba asütsü," ta pai ashi.

Washington DC nung yipru tesashi aruba ajanga benjong ya menu, kechiaser nikongdang National Mall nung adenshia alirte tesem balalai anizüker oa liasü.

Salute to America, Great American State Fair aser FIFA fan zone nung alirtem dang ansak ki aliba nung khen atema jenoka alitsü ashi.

Yipru süyba sülen benjong tenzüka Air Force One tasenba densema tayimtsü tem anünglen yimya süyi aser concert ayongzüka liasü.

Benjoang tembanga fireworks ya anepdang 1:00 ako meta (par mapang) sayua liasü.

Trump-i iba benjongmung 'politicised' asü ta aitsüba ya pai Freedom 250 tenzüka nungi adok, koba US Congress-i amenoka aliba America 250 commission den tokteptsü asoshi kibok nung senotsü

bendenba sentong ka liasü.

Party telemsa makai America 250 benjong nung shilem ka ama linük tesem ajungalen nüburtemi "America's Block Party" nung shilem agia sentong balala ayongzüka liasü.

Brehostibarnü Congress züngsemtem "birthplace of America" Independence Hall, Philadelphia nung adenshi, kong Declaration ya 1776 küm zülutepa liasü.

America 250 ayongzüker temi 'time capsule' ka arem, koba küm 200 nung lapoktsü aser yangji Coca-Cola bottle ka, Constitution indang copy ka aser states 50 aser US territories nungi artefacts tem dena lir.

Anü kanga atsükba ajanga Washington DC, New Jersey, Pennsylvania, Maryland aser Colorado tesemtem nung sentong thia liasü.

Tzüingsang kanga atsükba ajanga Wisconsin, Michigan, Illinois, Pennsylvania, Ohio, New York aser New Jersey nung ki o jen 750,000 shi nung power meliasü.

Ukraine den yimjung yangluba nung yaritsü Trump-i Putin dang ashi

Moscow, Chiteni/July 05 (Agencies): US Tir Donald Trump-i Russia lenir Vladimir Putin den telephone ajanga minute 90 jungnüa jembidang Ukraine rara nung tangatettep kati arutsü lenmang bushiba nung yaritsü mulunga aliba lemsatep, ta Kremlin aide Yuri Ushakov-i Deobarnep ashi.

Ushakov-i ashiba agi, Trump-i iba maongka ya Honibarnü, US Independence Day, jembidang pa taruba hopta Turkey nung NATO senden nung shilem agitsü aliba ajanga ashi.

Ukraine Tir Volodymyr Zelenskyy-ia Trump den jembio go ta ashi.

"Rara tekeraba nung tembangtsü aser mepetmesü ajangtettsü atema lenmang bushitsü renema aliba American tiri ano maneni shiogo," ta Ushakov-i Trump aser Russia tir phone ajanga jembiba indang ashi.

Ushakov-i Putin aser Trump phone nung sensaksemba ya "business" ama aser kanga tajung liasü, aser iba rara asoshi Russia-i yimden oangzüng ka aginer, ta ashi.

Kyiv aser par European

tembar linük temi rara maneni atsülanger aser tesashiba kumdaktsür aser civilian anema kiralongra mapa inyaker, ta Ushakov-i aitsü.

Pa ya Ukraine-i Russia nung talisa totzü industry nung amakba indang jembiba liasü, koba ajanga Russian region aika nung totzü agi anünga kumogo.

Putin-i tongpang nung chichiba tensa indang lemsatep, kong Russian armed forces temi temulung lemteta takok angur, aser tesem balala talenba nungi salatsür, ta Ushakov-i ashi.

Russian commanders temi Hokulbarnü Putin dang Moscow sepaitemi Ukraine anüdoklen Donetsk region nung tongtipang Kostiantynivka yimti agiogo ta shia liasü.

Honibarnü Zelenskyy aser Ukraine indang General Staff temi aji magizük aser Kyiv sepaitemi tang tashi iba yimti amokbanga lir ta ashi.

Russia-i kechi tangatettep südir süaka yangji Ukraine indang Donbas region ajunga Moscow küboki airdaktsüsüla ta ashir.

Ukraine-i aji magizüker aser Zelenskyy-ia taoba ita Putin dang ajuruteptsü ajungshi saka Kremlin

leniri memulung.

Ushakov-i ashiba agi, US envoys Steve Witkoff aser Jared Kushner nati tangatettep kati arutsü asoshi tetsüngtai aitsü merangtsü aser ano Moscow semdangtsü renema lir ta Trump-i ashi.

US-i linük ana tsüngta yimjung yanglutsü merangba anendaka lir, kechiaser Washington ya Iran den raraba nung rangloka lir.

Putin-ia sensaksemba mapang Iran rara nung US-i yimjung bener arutsü merangba ya ajaki agizüktetsüsa asütsü imlaba lemsatep, ta Ushakov-i ashi.

Putin-i Trump dang Moscow semdangtsü nenshia ashi, ta pai ashi.

Zelenskyy-i pa indang Telegram account nung US tir den kanga junga sensaksemogo aser rara indanga 1,200-km (746-mile) front line onük dena jembiba ta zülua liasü.

"Iba rara tembangtsü teimla lir aser America nunger temulungtetba ya tongtipang lir," ta pai ashi. Trump tena NATO senden nunga maneni jembishinü akatsü mulungtepogo, ta Zelenskyy-i ashi.

China aser Russia na annual joint naval drills agitsü

Beijing, Chiteni/July 5 (Agencies): China aser Russia na taruba hopta China anütok tzükümlen tzüyim aser anüng nung joint exercise balala ayongzüka agitsü.

Chinese Ministry of Defence-i Deobarnü sangdong ka ajanga ashiba agi, Qingdao port nung annual drills agiba sülen Pacific tzüyim nung joint maritime patrols ayongzüka agitsü ta metetdaktsü.

Kasa mapang nung Russian state media-ia, Russia indang Pacific Fleet nungi cruiser ka, corvette ka, diesel-electric

submarine ka aser rescue vessel ka iba drill atema Qingdao tongaogo, ta metetdaktsü. Iba drill ya July 13 nü nungi tenzüksü.

China indang Northern Theatre Command-i ashiba agi, drill nung destroyers ana, frigate ka, submarine ka, supply ship ka aser rescue vessel kati shilem agitsü. Linük ana nungi navy yagi reconnaissance, air aser missile defence, aser surface-strike exercise tem agitsü imlar.

Russia tir Vladimir Putin-i China semdangba sülen ita ana lir tang iba drill ya agitsü lir. Iba

mapa pai linük ana tesendaktep ya temaba jenjangi tuogo ta ashi. Kasa mapang nung China tir Xi Jinping-ia linük ana tesendaktep ya anokshitsü makok ta ashi.

Linük ana ya 2012 küm nungi Joint Sea exercise balala ayongzüka agia arudar aser taoba küm Russia kübok Vladivostok tesem nung exercise agi aser iba sülen Pacific tzüyim nung joint patrols agia liasü.

Russia-i kidanger Ukraine amakba ya China-i maitsüi arudar. China-i parnok teyongtsü nung lir ta ashiba den yimjung atema sensaksemtsü asoshi ayongzüka arudar.



OFFICE OF THE

AKHOYA STUDENTS' UNION

P.O. Changtongya Town, Pin-798613

District: Mokokchung, Nagaland

TENÜNGSANG AGÜTSÜR

Nagaland Staff Selection Board (NSSB)
CSRE 2025 tatidang agiba nung ozü
"Akhoya Shisaluyimer Telongjem"
züngsem nungi Wb.Wapang Imsong aser
Wt.C.Rongsenrenla Imchen na jala
Kr.Tiyongnaro Imsong-i Junior Account
Assistant under Treasuries & Accounts
Department, Govt. of Nagaland nung takok
tulu ngua ozü Shisaluyimer Telongjem
nem tang masü saka Yimer Yimsanger
ajak nem konang nüngsang tulu bener
arutsü nung kanga-sa pelaba den
tenüngsang tulu agütsür. Tarutsü anogo-tem
nung-a nü sempet aser mapa tajung
ajanga maneni tenüng tajung aser takok
ngutettsü asoshi asen "Akhoya Shisaluyimer
Telongjem" Sarasadem.

Shisaluyimer Wadang nung,

Sd/-
(Sb. Wapangtoshi K Jamir)
Tir
Akhoya Shisaluyimer
Telongjem

Sd/-
(Kr. Asenla Imti)
Tongti Zülur
Akhoya Shisaluyimer
Telongjem



Office of the

LONGKUM RIJU


MOKOKCHUNG,NAGALAND

Ref. No.

Date 03/07/2026

Tai nangzükur

Ni Mr Langkumbo s/o late Mr
Tahotahio Langkhum. Langkhum lima
Langkhum Riju mali, saka Langkumbo
Riju dang lir. Ta ni Govt mun zülur
agütsübaigi kenangpi teyagü ta
Langkhum Riju pur dang nangzükur


Mr. Langkumbo Jamir

① Ni Mr Langkumbo Langkhum Riju
nung agütsü nangzükur


Mr. Langkumbo Jamir

② Ni Mr. Langkumbo yimpang mender nungü
shi nangpm chai alibagü na Tenet nungü
Tahkür


Mr. Langkumbo Jamir

N.Korea lenir Kim-i missile tendangba asadang

Seoul, Chiteni/July 5 (Agencies): North Korea lenir Kim Jong Un-i naval destroyer Kang Kon nungi strategic cruise missile ka khaketa yokba aser anti-ship, anti-submarine aser air defence system asadangogo, ta state media KCNA sangdong ka ajanga Deobarnü metetdaktsü.

Tawa yangluba warship indang combat system tem asadangba nung shilem ka ama iba tetendangba ya Hokolbarnü agia liasü. System balala asadangba nung target-detection aser information-processing capabilities, integrated firepower systems, naval guns, automatic cannons aser electronic warfare equipment tem dnsema lir, ta KCNA-isa metetdaktsü.

Cruise missile khaketa yokba aser tanga tetendangba balala magi tsüngda Kim nem iba rong indang weapons evaluation programme indang metetdakja liasü, ta kasa sangdong ajanga metetdaktsü.

KCNA-i ashiba agi, Kim-i tawa prangbong hadir balala renloka aoba atema tenüngsang agütsüogo aser pai North Korea

rara atema renema alitsü asoshi inyakyimtem atsülangshitsü atema maneni inyaktsü ayongzüka liasü.

Paisa, Kang Kon takaratiba nung tendangtsü aser iba destroyer ya ita ana tsüngda naval service nung commission sütsütsü asoshi ketdangsurtem nem tetuyuba agütsüogo, ta KCNA-isa shisem.

Taoba ita tatemlen North Korea-i 5,000-ton destroyer Choe Hyon commission süogo aser Kang Kon inyaksangshi tenzüksütsü sentong aliba sangdonga liasü. Iba rong ya kasa class rong ka lir, koba naval modernisation drive nung shilem ka lir.

Kim-isa, taruba küm pongu tsüngda küm shia iba class nung warship anana yanglutsü ayongzüka den 10,000-ton warships ka yanglutsü sentong aliba metetdaktsüogo.

Kang Kon rong ya taoba küm sayaba mapang senchia aoba sülen yanglushia liasü. North Korea-i navy tashi itshitsü atema jenjang agidar, koba Kim-i ashiba agi, armed force nung telen balala rongnung ajak dang tashi meitiba lir.

World Cup: France aser Morocco na quarter-finals-i iogo



Chiteni/July 5, 2026 (Agencies): Deobar anepdang tang asaya aliba World Cup round of 16 nung France atema captain Kylian Mbappe-i asaya tanabuba shilem nung goal ka idaktsüba sülen parnoki Paraguay goal 1-0 agi koka quarterfinals-i iogo, kong parnok Morocco den asayatsü.

Philadelphia kübok Lincoln Financial Field nung team ana kanga meranga asayar minute 70buba nung Mbappe-i penalty ka ajanga iba goal idakja parnoki asaya kokogo.

Iba goal ya Mbappe asoshi

taküm iba asayamung nung goal tenetbuba idaktsüba liasü aser pai Argentina nunger asayar Lionel Messi den goal kasasa idaktsüogo. Tena Golden Boot atema toktepba mapang lir.

Paraguay, shrinoki round of 32 nung World Cup pezüben koker aliba Germany team penalty nung koka liasü, parnoki asaya tepeyong kanga junga defend süa asaya-a France pur tezüdangdakja liasü.

Asaya nung Desire Doue melena Bradley Barcola minute 61buba nung aitba sülen goal ka ya idakja liasü. Paris Saint-

Germain nungi asayar yagi tabelen nungi ball kanga junga bener lua defender tem aika paitoka aluba sülen pa penalty area nung Diego Gomez-i alangdakja liasü.

Referee Ilgiz Tantashev-i mezüngbo odang asaydaksü, saka VAR teyari agiba sülen penalty metsütsü maongka agütsü, koba Mbappe-i aibelen mesüi idakja liasü.

France pur Brehostibarnü Morocco den Foxborough nung quarter-finals asayatsü, koba 2022 World Cup semi-final asayashiba ama asütsü. Iba asaya ya France-i koka liasü.

Houston nung Morocco aser Canada na asaya ya Morocco-i goal 3-0 agi koka liasü. Azzedine Ounahi-i goal ana idaktsü aser Soufiane Rahimi-i mapang apuloktsür asayaba mapang goal ka idakja parnoki asaya akok.

Asaya ya Canada-i tajungba tenzük aser tetenzüklen parnoki asaya azüoka asaya, saka asaya tanabuba shilem tenzükler mapang tatsüka tsüngda Ounahi-i mezüngbuba goal idaktsü.

Iba sülen minute ti dang lir Ounahi-i tanabuba goal idaktsü aser mapang apuloktsür asayaba mapang counter-attack asüadang Rahimi-i tasembuba goal idakja parnoki asaya kokogo.

Morocco ya World Cup ana atonga quarter-finals tonga asayaba mezüngbuba Africa linük kümogo.

Everton-i George atema £24m agütsütsü mulunga agizükogo



Chiteni/July 5, 2026 (Agencies): Everton-i Chelsea winger Tyrice George alizüktsü atema add-ons densema pound million 24 agütsütsü mulunga agizükogo.

Arishi küm 20 tain asayar ya taoba season tesa dangbo Merseyside nungi asayaogo aser pa loan nung anir aoba mapang teti atema pound million 25 agi alizüktsü atema lenmang sadema lapoka yua liasü.

Everton-i mezüng

nangzükteper aliba ama masü saka pa pound million 18 shi agi alizüktsü asoshi jembishinü dang, kong European qualification aser asaya balala nung asayaba dak ajemdaker add-ons agütsütsüba densema lir. Kasa mapang nung Chelsea-i sell-on clause 15% bendenlokogo.

George taoba season Everton nungi asaya 11 nung asaya aser tetenzük nungi khen dang asaya liasü, saka manager David Moyes-i pa kanga

sakloka aküm.

George ya England Under-21 international asayar ka lir, shiba Chelsea indang academy nungi anitet, Pa taoba ita 12 transfer asütsü asoshi lenmang sadema lapoka liasü. Pa atema taoba küm lemluwa RB Leipzig den sensak asem aser Fulham dena pound million 22 agi ayoktsü asoshi sensak asem saka transfer window tatembangbuba anogo chirepa liasü.

Pa joko jurila tenangzükteper aser medical dang agütsü lir aser iba sülen Everton nungi asayar akümtsü. Everton puri Middlesbrough nungi Hayden Hackney pound million 16 agi alizükba sülen pa tang transfer window nung clubi alizükba tanabuba asayar kümogo.

Germany nunger attacking midfielder Merlin Rohl-ia pa loan nung SC Freiburg-i aoba ya permanent kümdaktsüogo aser Idrissa Gana Gueye aser Seamus Coleman nata contract tembangba sülen club toktsüogo.

				
TESÜSABA ASAYA OSANG				
Canada	0	3	Morocco	
Paraguay	0	1	France	
ROUND OF 16				
July 06	1:30 AM	Brazil	VS	Norway
July 06	5:30 AM	Mexico	VS	England
July 07	12:30 AM	Portugal	VS	Spain
July 07	5:30 AM	USA	VS	Belgium
July 07	9:30 PM	Argentina	VS	Egypt
July 08	1:30 AM	Switzerland	VS	Colombia

India A-i Sri Lanka A akokba asaya nung Brar-i wicket 10 agi



Chiteni/July 5, 2026 (Agencies): Galle International Stadium nung Deobarnü Sri Lanka A den tanabuba unofficial Test asaya India A-i wicket 10 agi kokogo. Iba asaya nung fast bowler Gurnoor Brar-i wicket 10 agia liasü.

Iba asaya akokba sülen Dhruv Jurel-i aniba India team-i asayamung ya 1-0 agi kokogo. Mezüngbuba Test asaya draw süa liasü.

Iba asaya nung Brar-i ajak dang nungi tajungba asayaogo. Mezüngbuba innings nung pai wicket 4 agi aser tanabuba nung 6 agia ajak senteper wicket 10 agia liasü. Sri Lanka A nem run 209 dang yangludaktsüba nung Punjab nunger pacer yagi teyari tulu agütsüogo.

India team Sri Lanka den taruba ita Test ana asayatsü lia mapang shitak ka nung pai kanga junga asayaogo. Taoba ita Afghanistan den Mezüngbuba ODI asayaba mapang pai kanga junga asayaogo, saka pa Test atemabo meshim, saka tang pai iba asayamung nung kanga junga asayaba sülen pa sempet tajung aser pa team nung züngoksemtsü langa aliba sayuogo.

Asaya mezüngbuba innings nung Sri Lanka-i run 366

yangluba sülen Sai Sudharsan-i run 168 yangua India A-i asayar 9 out ser run 543 (declared) yangluba nung teyari agütsü.

Devdutt Padikkal-ia run 94 aser Saransh Jain-i out mesüi run 70 yanglua team nem teyari agütsü. Jain-isa ball kanga junga ona innings ana nung wicket trok agiogo.

Sri Lanka A atema Ashen Bandara-i (87) dang junga asayateta liasü.

Tanabuba innings nung target run 33 dang toktsüba sülen India A-i asayar ka danga out mesüi asaya kokatok. Sudharsan-i out mesüi run 25 aser Aman Mokhadia-ia run 11 yanglua India team-i over 6.2 nung dang asaya kokatok.

India senior team Sri Lanka den August 15 nü nungi tenzük Galle International Stadium nung mezüngbuba Test asayatsü lia iba asayamung ya Sudharsan, Padikkal, Jurel aser Brar nunger asoshi asayashia atatsü aser parnok team nung shimoktsü langa lir ta sayutsü atema iba asayamung ya kanga tongtibang liasü.

Iba asayamung nung tanabuba asaya ya Sinhalese Sports Club Ground nung August 23 nü nungi tenzük asayatsü.

BILEMDANGANG

"Tesangwa nung kisüng jajaba dang nungibo tembar den amman nung jaja tajungba."